

十二

地 240, 21
39
212

重輯富陽縣志

富陽縣志卷十七

名宦志

昔光武平天下首舉循良論者謂東漢風俗之純實由此蓋令最親民司鐸丞尉皆佐令承流布化未有令循而民不感動者也蘇長公云吾州之俗民事守令如古君臣去輒畫像祠之而其賢者則錄其行事以爲口實至數十年不忘竊取此意爰摭孫吳以來賢守令之足爲口實者若而人著於篇而司鐸丞尉例得備書焉志名宦

孫吳縣長

富陽縣志

卷十七名宦

一

虞翻字仲翔會稽餘姚人也初爲太守王朗功曹孫策征

會稽翻歸策復命爲功曹待以交友之禮尋出爲富春

長策薨諸長吏并欲出赴喪翻曰恐鄰縣山民或有奸

變遠委城郭必致不虞因留制服行喪諸縣皆效之咸

以安甯及權立以爲騎都尉數犯顏諫爭權不能悅後

忤旨謫交州十餘年卒翻在當時名重天下州舉茂才

漢召爲侍御曹操辟爲司空皆不就嘗作易注示孔融

融答書云乃知東南之美者非徒會稽之竹箭也又爲

老子論語國語訓注皆傳於世其行事俱載三國志本

傳不縷及

舊修



吳郡守

全琮字子璜吳郡錢塘人也黃武七年丹陽吳會山民復為寇賊攻沒屬縣權分三郡險地為東安郡使琮領太守治富春至則明賞罰招誘降附數年中得萬餘人一境悉平及罷郡召還過錢塘修祭墳墓麾幢節蓋曜於舊里請會邑人平生知舊六親施散惠與千有餘萬鄉人以為榮琮仕吳多戰功累官至右大司馬左軍師其事績載三國志本傳舊修

宋縣令

諸葛闡之元嘉中為富陽令上議請禁夏至五色綵長命富陽縣志

卷十七名宦

一一

縷之屬蓋邑令之勇於任事者舊仍

齊縣令

何珣咸淳志作洵永明三年任富陽令定寇亂集散亡以德化

民邑以治稱見南齊書沈文季傳舊仍

梁縣令

張盾字士宣以謹重稱為湘東王記室出為富陽令廓然獨處無所用心身死家無遺財惟文集並書十餘卷酒

米數甕而已見南史張率傳新採

唐縣令

郝硤貞觀初年任富陽令十一年開陽陂湖以蓄水兼造

水閘溉田萬頃惠利在民

咸淳志作郝其唐書地理志作郝某按地理志不詳其名

咸淳志因某而誤作其此疑為形似之訛舊仍

李濬嗣聖十二年為富陽令嘗築春江隄自莧浦至東觀

山三百餘丈以障水患築陽陂隄儲水灌田民咸德之

祀名宦祠

唐書地理志云李濬萬歲登封六年嘗築陽陂湖隄東自海西至於莧浦以捍水患按富

邑不瀕海而萬歲登封係武后丙申九月改至十一月又改為萬歲通天並無六年之統疑唐書之誤舊仍

顧昇庠開元十年任富陽令建縣市平易近民親之如

父母

舊仍

崔士元永泰元年為富陽令居官一以文雅敷善政重建

學宮祀名宦祠

舊仍

富陽縣志 卷十七名宦

三

鄭年貞元七年任富陽令嘗增修陽陂湖隄溉田益廣載

唐書地理志陳善曰早與郝公以一邑令所建置而特

見紀於國史其利民非淺鮮矣

按兩浙金石志富陽令鄭口錢塘定山題名在

元和四年舊仍

董伸咸通八年為富陽令讀書好禮建城隍祠

舊仍

趙訥咸通十年任富陽令能文章知政體建縣治廳宇十

四年築縣城

舊仍

後唐縣令

陸仁章吳越寶正二年為富春令性寬厚有果斷建通聖

侯祠

舊仍

宋知縣

孫邁建隆中除大理寺丞知富陽縣沈厚有謀能斷大事

舊仍

周仁邈乾德五年知富陽縣勤於政事重建縣治

舊仍

齊唐字祖之山陰人少貧苦學登天聖八年進士嘗進龍

韜豹略賦士大夫覽者皆震聳兩應制科祕閣皆首選

兩對策皆第一當途忌其切直復排去遷著作佐郎知

杭州富陽縣改祕書丞累官至職方員外郎致仕熙甯

八年卒年八十七有學苑精英三十卷少微集三十卷

傳載張湜續會稽志新採

富陽縣志 卷十七名宦

四

邱荷康定元年朝奉郎守太子中允知富陽縣崇尙名節

扶植善類立郭侯廟碑

舊仍

黃彥字修中其先浦城人父挺爲吳縣尉彥熙甯中以王

安石經說與弟頡俱第進士知虹縣有古循吏風除楚

州教授宗正寺簿改富陽知縣爲政如在虹時乾隆蘇

州府志載有傳

新採

何去非紹聖四年以宣議郎出知富陽清儉率民修普照

寺塔

舊仍

吳怙知富陽縣勤敏有惠政建城隍廟崇甯元年加奉議

郎賜緋魚袋後祀名宦祠

舊仍

胡紡宣和元年知富陽縣政治有方四野樂業建秦望橋

四年開縣壕浙江通志橋作樓舊仍

楊尙友字令德建州人宣和中知富陽縣不事苛察民樂

其政仍舊

劉舉夔宣和末知富陽縣會方臘殘掠之後鼎新邑治百

廢具舉咸淳志作劉夔舊仍

趙詵之字晉仲紹興閒以玉牒朝奉郎知富陽縣練達政

務一時有能名仍舊

陸康民東越人紹興閒知富陽縣禁民游惰勸課農桑祀

名宦祠仍舊

富陽縣志 卷十七名宦

五

徐端輔紹興十五年知富陽縣修學校置學田建稽古閣

邑士爲之振起咸淳志作瑞輔舊仍

孫徹紹興十七年知縣事整修學宮二十年開放生池仍舊

陳字字伯愛常熟人以父臺簿遺爲莆田尉得劇賊例當

賞字不屑以人命爲進階辭之調紹興府司法隆興中

改知富陽縣分差鎮江府糧料院知湖州提轄行在權

貨務晚知房州歸卒年六十一字孝友廉潔居母喪鬚

髮盡白撫愛諸弟每食必同席俸祿不入私室家無金

銀之器嘗謂先世以清白遺子孫豈惟富不可求亦所

不願也蘇州府志載有傳新採

章才邵字希仲建安人紹興三年從楊龜山先生學乾道初知富陽縣以文章政事顯有題小隱山書堂詩按咸淳志作章才邵誤以楊龜山先生年譜正之舊仍

陸楠字國材長樂人乾道中知富陽縣善詩文修舉廢墜關湖鼻山路作石闌記題名碑舊仍

徐木字子才永康人乾道二年進士與陳聖嘉應仲實齊名而子才尤卓著及得邑赴富陽陳同甫亮作序送之

蓋官箴有自來矣序載龍川集新纂糜師旦字周卿平江人年十七登進士第淳熙中知富陽

縣能文章達政體歲饑竭力拯拯全活無算卒贈正奉富陽縣志 卷十七名宦 六

大夫舊仍

范之柔字叔剛純祐曾孫乾道八年進士嘉泰初知富陽

縣居官立身務以文正公為法課士文行兼修擢高第者咸出講席下一時稱儒吏嘉定間以禮部尚書致仕

卒贈端明殿學士謚清憲祀邑名宦祠舊修

王積翁字留耕參政伯大之姪也嘗宰富陽治績為諸郡之最浙江通志載入循吏傳新採

沈栢字濟之吳興人淳興中知富陽縣勤於政事尤善吟

咏咸淳志作沈相舊仍

陳嘉猷慶元五年知富陽縣能文章有舉廢之功建擁青

亭舊仍

樓瀟四明人嘉泰中赴縣任建高風驛免魚行屠戶治戶

錢行都建檄邑以石版進輸歲數千計民苦之瀟上書

陳其弊既免役呂昭亮因為記民懷其德祀名宦祠舊修

陳晃國嘉泰間任縣事嘗入府府君問以觀山渡之事初

觀山渡為豪強所據民無敢散渡而從豪船渡者必錢

充人滿而始行名之為買撲進士謝安頤控於朝禁之

豪以躓已而權要欲起之以賂故為之營營於大府府

君疑之晃國以實告且申文諸司以遏之而虎於水者

永絕新纂

富陽縣志 卷十七名宦

七

呂昭亮嘉定初知富陽縣縣有石版之役財匱力疲民日

以瘠樓公上書請罷之未獲命昭亮至預屬所知參政

路公為之陳情於宰執而率民投牒都堂據理爭之役

以免乃原其始為記以不沒樓公功并勒漕臺帥府二

帖於石著為令嗣建廳事築社稷壇民懷之祀名宦祠

舊修

程秘休甯人紹熙中進士嘉定五年知富陽縣惠心撫民

清修課士恢廣學校修整譙樓勑會江驛以及公館重

甃湖鼻山路植以石闌如舊嘗放生於通濟橋因名橋

曰恩波美績茂著累官至吏部尚書翰林院學士宋史

有傳舊修

曾治鳳字君輝晉江人

府志宣德志俱作清源人今從陳震瑞麥記為正

嘉定間

至任善詩文勤課士修湖鼻山夾道石闌為義役法又以民上秋苗多旁費請改輸銀以就簡民皆德之邑安仁村產瑞麥羣請上之於朝治鳳辭而陳震為之記以比張君為政麥秀兩歧之古謠焉祀名宦祠舊修

李彌高永嘉人嘉定中知富陽縣增修學宮建春江道院於廳事東偏以講道藝政清民悅程琬為之記舊修仍

周晉字明叔吳興弁陽老人周密之父也善書體兼虞柳

紹定四年宰富陽未幾慈明太后崩梓宮百飾皆自承

富陽縣志

卷十七名宦

八

辦不以一錢科擾民民稱為周佛子擗節浮費修學宮備祭器刻其模形於石治會江驛驛為大閣顏曰清涵萬象闢縣圃鑿池建堂得雙蓮之瑞因名之為合香取古詩風合兩花香意也載周密癸辛雜識新採

趙汝崖天台人系宗室景定四年至任清儉自持修縣獄

建迎秀逸雲澄江三亭舊修

元縣尹

李質字子文大名人大德時任縣尹居官八載多美政教

諭董奕為撰去思碑舊修

夏仲與號節齋至治二年任縣尹有惠政泰定二年秩滿

還朝民懷其德立碑志遺愛元末碑仆明正統初吳堂訪得之使人舁至廳事然刻文殘闕不可句讀矣祀名

宦祠 按劉基學宮記仲與名賜疑賜卽名仲與為字節齋其號也舊修

曹忠字惟良燕人為富陽尹下車首以敦本厚俗為先務

適孔子廟壞乃捐圭田之入率士籍之優饒者共謀建

立廟既成聘名師招俊民而教養之不數月絃歌禮讓

之風達於郊鄙繼新三皇之宮社稷之祀下至郵驛河

梁百廢具興歲六月不雨禾將槁忠走祈山川甘雨隨

注馬山有虎白晝傷人忠投檄山靈虎尋去見楊維楨

曹尹惠政碑 新採

富陽縣志 卷十七名宦

丁良卿泰興人至正十年任縣尹為政以教學為先新學

宮出俸銀先為創率返學田禁豪民莫敢侵吞有丁良

卿重修學宮記見誠意伯集 新採

明知縣

楊敬麻城人洪武元年任知縣初闢草萊開縣治建學校

哀鴻有集吠犬無驚民懷其德祀名宦祠 舊修

孟斌洪武十年任知縣修廣學校平易臨民時稱賢令 舊仍

吳蒙洪武三十年任知縣獎善懲惡民翕然嚮化 舊仍

吳堂樂平人宣德九年以進士官於縣嘗繪楊震卻金故

事懸私室以作箴僚佐入謁以清慎勤二字勉之由是

百弊盡釐訟牒稀簡在任九年興學校營譙樓奏減縣
貢聘修縣志築春江隄以捍患復觀山關以禁奸廣城
隍廟起子陵祠此其事迹之彰彰者性介直不阿權要
舊與部使者不合解組去百姓詣闕求得允復職一邑
驩呼如獲至寶已而秩滿去官民復遮道泣留不獲懸
其鞶於譙樓東以誌遺愛釀金立祠以報其功縣有報
功祠自此始祀名宦祠舊修

鄧淮吉水人

府志作
福建人

宏治二年任知縣有惠政始移學廟

於西崇重先賢敦尚風教嘗訪俞膺遺文表章之優恤

其子孫祀名宦祠舊修

富陽縣志

卷十七名宦

馬溥然內江人乙未進士宏治十五年任知縣值歲饑懲

刼掠遏強梁民畏之不敢犯法新採

陳伯亮福清人戊辰進士正德四年任知縣明察爲治吏

民畏服亦有建明新採

劉初安福舉人正德十二年任知縣重刻富陽志書嘗具

疏以縣內驛路衝繁江潮泛溢正供之外若御茶若鮓
魚若時憲書之紙札皆一物而十其費始得上達京畿
乞陞縣爲州統屬餘臨新於等縣協濟以舒民困不果

行新採

方舟字柳溪婺源人嘉靖九年以進士蒞縣任易直豈弟

能以文學飾吏治修學宮建觀山鍾樓跋縣志增職官
選舉姓名彬彬稱儒雅之選舊仍

王惟孝字希曾上元人由鄉貢署吳江教諭嘉靖十二年
升任富陽知縣敏幹慈祥砥勵清操初蒞任即請賑饑
於兩臺巡按張景賢之輒報可已復上疏以縣驛路繁
而差徭難給江潮淹而禾稼歉收歷書之貢紙冬漕之
納米兩役迫於一時民何計以卒歲乞改漕糧入嘉湖
本縣代之輸銀下部議覆不果行居數年以卓異徵為
監察御史按蘇州府志引王惟孝
字希舜貴州人舊修

奚樸黃岡舉人嘉靖二十三年知富陽縣惠政及民有去

富陽縣志 卷十七名宦

思碑新採

桂軌字信齋安仁舉人嘉靖三十四年至任明察能斷廉
公有威舉廢飭靡百務振作其明年建置縣城籌財用
完器備度時日量地鳩工計丁均役初若重難事已帖
然論者美其翺始之功舊修

施陽得字中川無錫人嘉靖四十四年至任愛民禮士一
時徧著循聲以恩波橋為邑之通衢岸闊水深易木為
石旁衛以闌更其名曰永濟恢宏壯固至今賴之祀報
功祠舊修

劉汝昭萬安舉人隆慶四年至任脩學宮置學田闢文明

門陞南京大理評事去 舊修

李啟湘陰舉人 一作龍陽人 萬曆二年至任坦直慈和視民如

家人父子待賦長有禮不加鞭扑嘗有僧尼犯奸者始鞠時極詆其不守法戒俟其情急則判以蓄髮台婚聞者粲然僧若尼亦羞亦喜不自知其頭之觸地啟諭而起之曰好爲之汝菴寺少一禿髮吾邑里多一農民也時謂之李老伯有去思碑 舊修

管九皋字鶴野廣德舉人萬曆十一年至任催科不擾而樂輸斷獄不苛而畏罪時皆稱其神明課士而整脩學校利農而營築堰隄事必計其久遠後擢監察御史改

富陽縣志

卷十七名宦

十三

按察司僉事去民立祠祀之 舊修

季概六合貢生萬曆中至任爲人長厚有幹才居官多行善政崇學校疏鹽引革稅弊民至今享其利 舊仍

任才欽晉江舉人萬曆二十八年至任生平究心理學下車日清釐賦稅以除吏弊旌禮節孝以作民型二端旣立闢地爲說約堂與諸生講道藝修名教景嚴子陵之高義振修祠宇立石記之 舊修

王橋字榮子彝陵州舉人萬曆三十二年至任明敏練達重良士抑豪民徵輸有方胥吏懾服重建學宮修城隍廟清理沙洲新地號能吏焉歷官至貴州按察使 舊修

方開臨湘舉人萬曆四十年至任平易廉靜吏民安之試

士精於藻鑑號稱知人

舊仍

楊春杖

通志作春杖

雲南舉人萬曆四十六年至任有幹才知

大體遇事練達能斷吏不敢欺修城垣建儀門頗著政

聲卒於官士民懷之

舊修

蕭岫景陵舉人天啟元年至任勤敏精察遇事能斷奸豪

為之斂迹置常平倉以積穀貽惠方來

舊仍

盧為敖字非敖景陵舉人崇禎四年至任為人正直廉潔

胸襟拓落所作詩文能自出機杼逸邁非常已而改教

諭去

舊修

富陽縣志

卷十七名宦

十三

杜斗愚字慕之清豐舉人崇禎七年至任慈和豈弟禮士

恤民有循吏風坐媼家絳誤去官今觀山關壯繆祠尚

有杜君所立碑父老睹物思人嘗慨惜之

舊修

董煜字葵陽山東威海衛貢生崇禎中由杭州通判署縣

任廉能勤慎凡徵收條賦令民自以函投匭吏胥莫可

誰何知里催差催多擾民撤去之而下檄文以相催有

三催不至者始發役追之不得額外立加耗名由是民

懷其惠輸納恐後時稱良有司八年卒於杭署

舊修

錢炳太倉州貢生崇禎十六年至任為政寬和務以德化

民訟息刑清人至今飲食必祝之

舊仍

漢縣丞

張湏臨安志云張君之名髣髴如湏或疑為張湛亦非也漢時縣丞漢杜林釋載有富

春丞張君碑碑文殘闕不可讀惟銘辭有成句者如云

佐政流化垂歌吳域位細德彌禮讓雖穆則張君之為

丞可知矣新採

宋縣丞

李彥穎字秀叔湖州德清人少端重強記登紹興十八年

進士第主餘杭簿守曹泳奪酒家業為官監利其貲具

彥穎爭之泳怒戒吏鍛鍊不得毫髮罪調建德丞改秩

時宰知其才將處之學官或勸使一見彥穎恥自獻不

富陽縣志

卷十七名宦

十四

往調富陽丞勤約有惠政御史周操薦為御史臺主簿

改國子博士歷吏部侍郎參知政事宋史有傳舊仍

明縣丞

溫純甯都人隆慶六年任縣丞徵稅有法幹理優裕署縣

事循聲更著撫軍旌之曰催科不擾持守不苟一時稱

良吏云舊仍

吳朝俊字爾雅廬陵人萬曆三十二年由序貢任縣丞守

正不撓吏民畏服署邑篆操守益厲士論稱焉舊仍

鄭舜卿萬曆三十七年由吏員署丞篆材能通達試童子

邏察維嚴傳遞之弊乃絕舊仍

施學淵無錫人以選貢授縣丞萬曆四十七年蒞任溫良
儒雅吏民愛服署縣事課士錄考衡鑑得人去後人咸
思之舊仍

韓京德瓊州人崇禎十一年以貢生任縣丞悃悞自好不
邀聲譽潔已守官持正不苟與當道難今致仕去舊仍

宋主簿

楊簡字敬仲慈谿人乾道五年進士主富陽簿會陸九淵
過富陽問答有契遂師事之自爲一家學陸氏以袁燮
舒璘沈煥與簡爲高弟世所稱袁楊舒沈是也富陽邑
民多服賈不知學簡興學養士文風益振學者稱慈湖

富陽縣志

卷十七名宦

十五

先生累官至寶謨閣學士卒祀名宦祠舊仍

葉延年吳興人淳熙十二年任主簿修儒學置書籍撰題

名碑記又善詩文嘗寓西湖有句云一夜西風驚客枕

滿隄楊柳作秋聲與胡賢良恍善時相唱和舊仍

徐自明淳熙間主富陽簿能詩文立小學留意訓迪應舉

得人舊仍

王遂字去非金壇人吉州太守萬樞之子生十有一能應
舉十四與伯兄逢試江東對策詆韓侂胄皆勘罷旋以
吉州任子恩銓主富陽簿後三年逢中第又三年遂亦
第仍赴富陽任而吉州卒伯兄亡遂奉母治喪盡禮延

師訓諸弟爲女兒擇對孝友之行著聞服除而佞胄誅
死參政衛涇以前事白堂差教授楚州理宗朝擢江西
安撫使權工部尙書卒諡正肅見京口耆舊傳新採
王遵道字允行萬厯三十一年主富陽簿爲人瀟灑風雅
與民相安常登山臨水延文人課題賦詩有王仲子詩
集行世旋陞縣丞後轉知縣舊仍

唐縣尉

卜長福開元十七年上續文選三十卷授富陽尉見新唐

書藝文志新採

宋縣尉

富陽縣志

卷十七名宦

六

陳從古字希顏金壇人元符進士錢塘丞陳城之孫紹興
二十一年登進士第由富陽尉用賞改秩爲邵州教授

監行在權貨務都茶場見京口耆舊傳新採

張湜字叔清能詩紹興己卯與僉判紹興王梅谿相酬答
官至閩中大府掾王文忠集有酬富陽尉張叔清并次

韻見寄詩新採

陳震合沙人任富陽尉能文嘉定丙子縣令曾治鳳重修
湖鼻山欄石陳震爲之記十一年戊寅邑人獻瑞麥震

復爲文記之舊修

明典史

譚瑚宏治末任典史病南京之額班申頂外縣長夫爲慮深遠處下僚而有惠民實政人所難能仍舊

宋光祖字少南福建人萬曆二十二年任典史歷官九年敏幹守法士民胥悅陞崖州吏目行李蕭然士論許之仍舊

宋教授

絢紡字分素元姓句犯上嫌名遂增糸爲絢其音如章句之句宣和甲辰赴省試不利建炎戊申試維揚又不利時年三十八矣紹興甲寅詔下乃與道州富家子入舉場俱薦送明年遂登第首尾十二年凡三見夢方驗事

富陽縣志

卷十七名宦

載洪邁夷堅甲志紹興十七年乙卯任富陽教授縣令徐端輔重建學廟作稽古閣絢紡爲之記新採

元教諭

張元誠至正九年任富陽教諭明年縣尹丁良卿新學廟各以其俸先之劉基爲之記新採

潘庭堅字叔聞當塗人元末爲富陽教諭謝去明太祖徵爲帥府教授慎密謙約爲太祖所稱至召爲學士庭堅已老遂告歸洪武四年復召至主會試事見明史范常

傳新採

明教諭

朱瓘莆田人宏治二年以舉人任教諭啟迪有方名賢輩
出祀名宦祠舊仍

杜子新福甯人正德二年由舉人任教諭振興樂育繼美
前人經學文章之盛一時莫比六年改吳江教諭去舊仍

趙潛江陰人萬曆二年以歲貢任訓導五年陞本學教諭
以正律己以道訓士嚴肅整飭迄今士人思之舊仍

錢夢祖桐鄉舉人萬曆三十五年至任勤於課業頗稱得
士邑有節孝輒爲撰傳以表揚之舊仍

陳善學諸暨舉人萬曆四十五年至任甄譽髦精課業刻
春江擘藻集延山陰俞調鼎以詩酒結社風流文采掩

富陽縣志

卷十七名宦

六

映一時舊仍

方國儒字道醇歙縣人幼孤事母以孝聞辛酉舉於鄉崇

禎二年任教諭朝夕課士不少倦刻尺木堂社集見稱
一時旋陞保康縣知縣去舊仍

王思卿松陽歲貢崇禎五年任教諭卻貧士贄更加周恤
舊仍

明訓導

楊正福建人宏治十八年由序貢任訓導誘掖多方士類
樂從儒行文風日臻於盛追論風氣者必以瓘正爲先

河舊仍

王之信新水恩貢萬曆三十八年至任博雅能文齋中聚
三教書自號三一先生子瑛亦善詩文舊仍

曹師曾字約我宜興人天啟六年以歲貢任訓導特立不
回講學課藝卻贅周資導俊髦旌節孝士論以配江陰

趙司訓云舊仍

章高拱宣平歲貢崇禎十二年至任能詩多題詠贊修學

宮刻儒學續題名記舊仍

國朝知縣

朱永盛字泰寰陝西城固舉人順治十六年授知富陽縣
事攜二僕襍被至官丰神峻潔胥役見而憚之以天下

富陽縣志

卷十七名宦

十九

初定綱紀未詳時與士民相見訪知利弊而規畫之會
山寇未靖或請剿以兵曰否是逃死者耳招撫以恩而
降者無算有以逃役聞者或請懲以刑曰否是重困者
耳均編以法而貧者得息由是吏畏其威民稱其德法
立不撓令至必行營城隍廟及縣署廊廡開北城河立
永濟渡修恩波橋築三墩以衛之觀政者嘉其績焉以
康熙三年卒卒之日合縣痛泣服衰三日柩歸白衣冠
送者數千人舊修

牛奐字潛之長治選貢生康熙九年任多惠政縣南門
外江中新漲沙洲一片鄉民南北往來必歷兩渡行者

病之十二年，與乃丈量中沙新漲地，得百八十畝，分給舟子，設義渡船八隻，編爲金石絲竹匏土革木八字，以金石絲竹四船爲中沙北江之義渡，匏土革木四船爲中沙南江之義渡。舟子工食取給於地，行人登渡不得需索。錢文邑民至今利賴之尤善。屬文嘗因宣德舊志續葺富陽縣志，逾年而書成。會三藩用兵，未及進呈。越十年，錢晉錫來知縣事，詔徵天下郡縣志書，乃復因牛奐之舊，重爲編纂，進於朝。今所傳錢志是也。唯錢志書成，浹月採訪搜討，疏舛猶多。然邑中文獻賴以不墜。晉錫字方來，太倉州拔貢生，居官修文廟，築南

富陽縣志

卷十七名宦

三

門城樓建大嶺新亭，政績茂著。二十五年，以卓異陞任去。新纂

趙祿，星遼東官監生，康熙十四年至任，明敏有幹才，軍需民徭措置悉當，鄉設保正以弭盜，源村落安堵。一邑賴之。新採

多永，俄字誠齋，滿洲人，康熙四十一年以理事同知署縣事，居官多善政。先是牛奐撥給舟子中沙義渡地，飭章邵二紳分佃。後邵紳以分佃之地私自變賣，舟子不得食而北江之義渡遂廢。南鄉民因事至縣，必紆道附下游，永濟渡過江行者病甚，邑民訟之。官官阿紳不得理。

及永俄至任廉得實徧牒上司案爲平反自捐百金贖
回邵所賣地仍歸義渡復牛免故績又諭嗣後中沙有
新漲准補義渡之舊坵豪強不得佔佃勒石著爲令民
感其德建碑頌之其文有云公下車未及半載善政奚
啻千端崇聖教則改築宮牆廣 皇仁則清除淹禁當
堂完花燭全兩姓之婚媾撫字簡催科免萬家之驚擾
片言折獄民自無冤冰鑑衡文士皆知奮蓋紀實也雍
正七年章紳後裔亦將續佃新漲地一十三畝抵充
國課時宰朱永齡又捐廉代章完課贖地還渡由是南
北兩江義渡至今不廢邑民爲立德政碑并建祠於中

富陽縣志

卷十七名宦

三

沙與永俄同祀之永齡字眉子籍貫失攷

新纂

戰效曾字魯村直隸甯津人多髯性純孝事母太夫人能
盡歡乾隆三十六年由嘉善縣奉調至任延蕭山汪輝
祖入幕輝祖道義人佐州縣治數十年未嘗不著政績
效曾敬禮之用以相助爲理而聲施爛然識者稱其知

人善任云

新纂

惲敬字子居號簡堂江蘇武進人幼負異才持論驚長老
舉於鄉充官學教習與同州張惠言友治古文得力於
韓非李斯成一家言乾隆五十九年奉選至縣高材大
器不肯隨羣輩俯仰惟縣內知名士若高傳占周凱輩

與其在幕之張惠言則傾心待之嘗登春江第一樓甚
歡撰聯云幾人憂樂與民共如此江山作畫看一時爲
之閣筆然終不得行其志退與三子謀將纂修縣志而
大憲抑苦之令解黔饑起曰王事也願趨之反役調江
山縣去縣志不果修賚志卒嘉慶二十二年也爲人負
氣矜名節時嫉之故官止吳城同知而聲滿天下所製
古文世以與方望溪先生並列稱方爲桐城派稱惲爲
陽湖派著大雲山房文集八卷書事二卷其治獄別有
子居決事四卷嘗謂其文皆自史遷出下史公無北面
者李元度撰 國朝先正事略載入文苑新纂

富陽縣志

卷十七名宦

三

蘇世傳嘉慶八年以進士知富陽縣甫受篆慮差役之擾
民也乃散其半使歸農有訟者令原告持諭傳被告不
至飭差一人協里正共傳之差計里給錢手硃筆簽於
票不得於所簽外多索分文又念富陽地瘠民貧百姓
完課須以貨易錢轉輾虧折甚多乃令各隨其地所出
之貨輸以代課征賦之日邑民紛至或持絮布或持菽
麥或持雞卵等物甚有以雙不借上供者世傳悉令納
之庫土貨山積無異襍肆歲終約計各物於署中服食
外悉以散給差隸曰免若輩取資民間也會俸滿以卓
異上考咨送入都董相國誥以桑梓德世傳乃設盛筵

於府第延之上座召諸朝貴列坐陪飲酒酣相國執卮對眾客曰此吾邑賢父母爲當今循吏第一俾諸公一識荆也於是諸朝貴咸肅手起敬相國又曰賢父母上計宜調繁吾邑民福薄不獲長留寇君世傳起而對曰富民遇我厚若獲還舊治願甚相國爲歎息者再及復任勤政卹民倍於昔日嘗自誓曰不敢負相國也而民感其德亦化於無形終任三年民無犯死罪獄者新纂陸玉書字菸田江甯人道光三年至任有幹濟才不屑俗吏補苴之爲而先事用其懲勸謂勸善莫難於婦人而表名未及於苦節非教也乃訪城鄉耆居之合年例者

富陽縣志

卷十七名宦

三

凡百四十人羅冊入請

俞旨至涓吉日治盛筵大

會於邑之社廟命其孺人揄狄象服率以謝闕然後

出就主席俟其以次坐定手玉尊斟黃流爲眾嫠婦壽

宴畢各贈金花紅綾二端手書四字匾額儀從鼓樂導

送歸家觀者美之以爲官之善爲勸也每歲孟夏鱗魚

至羣聚觀山麓之澄潭若以時朝嚴祠也者乃勒碑於

祠下潭上曰子陵先生垂釣處蓋欲爲有志者勸也舊

時漁人首獲鱗必獻之官凡官中人市魚半民間給錢

謂之官價至此胥吏因緣爲奸并半價不易給之玉書

廉得情旣卻所獻魚又欲爲無恥者懲也出示禁之而

官價買魚之弊除一日坐堂皇邏卒捕鄉民至謂之私梟視之則老人也初縣內貧民例得如數販鹽謂之十八老小區挑有碑立觀山之麓已而商匿其碑遂指販鹽者爲私邏卒甚或通人擔鹽入富家而訛詐之是民失鹽利且受鹽殃矣玉書素知之間曰汝孤弱一人何敢爲此對言同事十數人皆逸吾慢走故至此曰汝走奚若試復爲之老者走躩如曰汝走盤桓何時得出直奔則免耳老者逕趨出邏卒譁然怒曰汝等放私梟十數人我獨不得放老年一人乎勿多言我不爲汝主下使隸逐之去聞者快之以爲官之大能懲也其他尙多

富陽縣志

卷十七名宦

三

美政不備書凡有關於懲勸者已述之於詩有政餘偶

鈔一卷載藝文中新纂

姚步萊字蓬仙道光五年至任縣舊無書院甫下車欲振興文教而集資創造之於是首捐俸廉度地於後河之濱築講堂并兩廊東西齋稱是名之曰春江書院工未竣而卒士感其德設位書院與太湖李世彬共祀之世彬字子蔚庚申進士七年至任繼姚令之後力贊成功爲人雍容儒雅善撫綏舊時凡一官去民有冤苦焚草扉紙錢以送之獨世彬去任民皆焚香遮道留船停南

門埠者三日新纂

吳芳蕙字瑤階江西南昌人咸豐四年以進士赴縣任年
少不拘小節時遊莫浦飲酒賦詩或嘗譏之爲人眇一
目善閱文縣試終日坐堂上卷畢繳而文亦閱竟所選
皆能文士士亦稱之次年秋水潦大降登觀山望之浩
浩無際禾稼盡淹憤投其冠於水手爲報災文羽飛入
杭上司急催科覈其所報災非惟蠲且宜賑召使易其
文執不可怒曰汝不爲頭上計乎曰烏紗已送入水矣
竟以此撤任去眾然後知其爲鐵中錚錚者也新纂

邊厚慶字雪坡任邱進士咸豐七年署縣事性剛直不畏
強禦凡聽訟扶貧抑富勢豪皆斂迹會龍門村有毆鹽

富陽縣志

卷十七名宦

三

捕事商怒愆大府調兵擒治至縣厚慶犒而款留之疾
馳肩輿入村約縛數人以解此獄眾懼株連不敢應曉
之曰犯爲兵獲權在兵犯爲官獲權在官事急矣若須
聽吾言吾爲若力保全也眾悅如所約并焚香拜送厚
慶潛入縛送者於獄謂兵官曰犯人早自首毋勞大眾
往返君等且去吾亦帶犯下矣於是躬謁大府具民悔
服狀爲請命者再大府首領之獄以是得減等論粵賊
亂大府檄縣練民團委縣貴紳某總其成厚慶不欲以
團餉重累民強貴紳出巨貲爲供備貴紳銜之密懇大

府調任去

新纂

姚元滋字潤生上海舉人同治十二年署縣事峻風裁絕
苞苴疾惡如仇嘗曰牧民如牧馬去其敗羣者而已縣
有著名惡矜煽民興訟以圖利其人亦小有才前官或
引與計事元滋不爲惑密訴上官出不意拘之於是投
告者紛紛詰之盡服援例抵罪合縣爲之稱快時當縣
試功令森嚴無敢作弊衡文如鑑士亦允服未幾染風
疾力疾治事遂卒邑人惜之爲設位祀焉新纂

劉宗森字東垣涇陽副貢初爲學官以輸饒功左文襄公
保授知縣光緒六年至任性慈祥喜親民凡出遇田夫
必召問疾苦慰之勉之若父兄之訓子弟其聽訟遇有

富陽縣志

卷十七名宦

三

耆民跪階前則使起而立談問家計咨民艱勸以鄰族
相關之誼忱以子孫相報之寃聞者氣盡故訟息而不
下斷語說者以爲不斷之斷真善斷訟也粵匪之亂

文廟燬嘗欲建之而未逮會撫院釐定漕額斗米折
錢四百六十著爲令而舊時漕價後輸者按期加耗至
千錢僅抵斗米宗森暫以斗米加五錢積爲建學之工
資而又以縣無義塾捐俸廉延學師權館邑廟之邃室
時取四書爲講說字解句釋雖鄉里之老衿弗過也至
書院則月定兩課聘杭州吳氏超爲主講厚其資給正
其文章飭其行誼肫肫切切雖金石之勒銘無加也間

一歲彙其所積漕項錢得五百金清沙礫築垣墻而

文廟有端緒矣在任五年視富陽如桑梓士當窮迫則厚卹之民告失亡則溢償之壬午榜發士不登名起巽方觀山之平頂爲步雲亭以峻之嘗曰富陽錢富陽用我不以官爲商也每食蔬菜四碟麥不托一盂有客則命注酒一尊談笑飲噉未嘗不甘而飫之已而忘食懷憂得疾且殆或問之但曰兩無其極傷我稼穡遂卒蓋其時秋霖未霽也事聞人巷哭幾罷市紳士入視僅有番銀九十餘枚或賻之或襚之始得以禮入殮逾月誕一遺腹子民喜走相告以爲天不絕我公後也其益

富陽縣志

卷十七名宦

三

年漢中門下士來逆喪民爇香載道至杭猶相約祭奠有王姓某拜不能起伏地哀哭人怪問之王姓蓋誣訟不直夙繫於獄者也有頃起曰吾前罪應責竊見堂上執牘徘徊閔閔有不忍之色竟獲免吾在鄉時感而泣下者屢矣今覩此焉得不拜焉得而不拜且哭蓋其感人如此

新纂

蕭治輝字蘊齋臨桂舉人光緒十二年署縣任精吏治折獄如神每聽訟不坐堂不冠帶嘗手持淡芭菰管隨意所之坐呼兩造來前笑譚問答如家人父子然雖善訟者亦不自覺其情實之傾吐也先是縣有水患洋漲沙

名恐係明
字之誤

爲甚百姓因饑求賑闖入署前宰某以叛逆告大府統
兵下鄉縣以差役繼之一時蹂躪無完土治輝未受篆
先棹扁舟詣鄉目覩情形爲之惻然及下車卽出示招
集逃亡使民復業並嚴禁差胥曰凡爾在官人役有敢
入西南鄉之洋漲沙藉端恫喝取其一草一木者罪無
赦於是民得以安堵無患而大獄卽因之以解論者曰
此地復睹化日皆蕭長官之賜也旋報績調繁去

新纂

周學基字篤生廣西靈川人由庶吉士散館授知縣光緒
十三年至任溫文爾雅彬彬如也士紳有晉謁者輒優
禮待之相與議論恒以振興文教爲亟亟邑之

文

富陽縣志

卷十七名宦

三

廟匪毀後三十餘年矣先是邑宰劉議建未果以漕餘
銀築垣牆而止學基見而歎曰是誠守土者之責也吾
又何多讓焉乃集都人士相與謀所以建復者謀旣洽
卽以其俸先之而邑之人亦遂羣相奮勉輸將恐後數
月閒巨貲集焉命士紳之勤慎者數人董其役而一切
出納之數自總之弗假手於人杜糜費也踰年百廢具
舉廟貌遂煥然以新一日有僧坐事逮官罪應治僧求
以寺田五十畝贖免學基以富邑多寒士許之充入公
謂士子三年大比得是田之所出津貼之雖曰小補抑
亦賓興之基礎也爲立石書院以俟後此之擴充焉而

富陽之有賓興自此始在任四年其他美政尙多之二者庠序垂其功士林懷其德富邑之文教振興有自來矣詩曰豈弟君子令德來教其學基之謂歟旋調諸暨卒於官

新纂

國朝縣丞

蕭琴字企夔號以堂湖北漢陽人以詩禮世其家年二十六補弟子員屢試不第以優貢遵例爲校官旋授鄖西縣訓導嘉慶元年權鄖陽竹山縣知縣司鄖西臺站糧餉六年授來鳳縣訓導遷浙江富陽縣縣丞丞嘗分縣令權充衣食資琴至曰丞自有所以爲丞者戒胥役非

富陽縣志

卷十七名宦

三

令使不得專有評訟者訊其由牒諸令胥役無以自給潛引去琴日啖餽粥課子若孫吟哦古廨中宴如也邑士大夫高其行率其子弟執贄於琴琴崇論閎議暢明經學闡發奧旨娓娓至夜分不倦一如爲教官時士從之者日眾廳事西偏有古柳數行埽除枿莽布几席招所與遊者討論其下城東隅爲東觀山山有樓曰春江第一樓臨大江時率其弟子會文斯樓手加評隲於學通三禮制藝尤精存少年試作六十餘首曰擷澗山房試草著春秋時勢圖說官禮精義儀禮易讀諸書嘗權富陽縣事以羨餘爲前縣令補苴二千八百餘金不私

一焉以病乞歸改湖北鶴峯州訓導道光二年卒於任
年七十五新纂

國朝教諭

趙嗣萬鄞縣舉人康熙十七年任教諭捐俸修學廟與縣
令錢晉錫司訓楊思蟾鄉貢士邵士莊等共成之嗣萬
爲之記新採

錢元祐字星陞嘉善人康熙甲子舉人任縣教諭造士有
方若何如榮董文恪輩皆出其門戊子應聘江南同考
得士如天長陳以剛輩皆積學士庚子富陽大饑上官
捐俸買米佐賑邑胥吏通同乾沒元祐發其事吐所蝕

富陽縣志

卷十七名宦

三十

米散給全活甚眾選金華教授秩滿陞國子監監丞著
有雲起堂詩并春江詩輯新採

徐爾夔字會清德清人雍正乙卯科鄉舉第一少有至性
年十四喪母以頭觸地至流血被面侍祖母疾衣不解
帶二十餘日待弟更友愛所分產悉以讓之官富陽教
諭著有三恕堂詩鈔其感懷云自信生平無俗累好留
清白與兒孫亦可見其志矣新採

蕭汝霖字又巖蕭山舉人同治五年選授富陽教諭在官
十年舉動必依禮法人無敢干以非者富陽缺瘠苦或
苛索諸生脩贄以自肥汝霖廉而潔日用不足則授徒

館穀以資補給月課諸生文必法先正有以敷飾詞藻
進者必痛斥而力戒之手自評點文卷指授改削無異
親炙尤愛才有呂生某恃才不羈屢與邑中要人忤要
人嗾之宰并副齋某宰欲褫呂衿副阿宰爲請於汝霖
汝霖不爲動宰怒撫致呂短申詳上官上官據詳行文
下縣轉牒學飭拘呂科罪副聞之喜先詣縣乞得憲札
手持至汝霖齋對之朗誦意揚揚頗自得汝霖忿甚詈
曰汝官耶上司行文自有驛卒投遞卽下縣轉移理合
飭役齎送汝身任學官而爲之作走卒耶副語塞狼踰
走然汝霖亦卒不爲動呂遂賴以免由是感激折節爲

富陽縣志

卷十七名宦

三

善士未幾登賢書汝霖旋以俸滿積資推知縣選授甘

肅會甯縣

新纂

施啟瑞字覲初餘姚人光緒十一年由舉人選授縣教諭

甫下車慨念學宮久未建復而釋奠禮器亦缺焉未備
乃捐學俸購置籩豆簠簋各器具稱是旋縣令周倡建

文廟與有功焉月課諸生文必法先正閒集武士

校射於兩序中者飲以酒有趙生善事親啟瑞上其事
於學使者頌額題門以爲表式嘗欲修葺富陽縣志未
果乃留心蒐採訂有志彙若干卷時學使者方輯兩浙
輜軒詩續錄檄啟瑞襄校十閱月錄告成以勤職上計

命在任候陞教授未及遷卒於官新纂

國朝訓導

楊思蟾字國賓天台拔貢生康熙十七年任縣學訓導能詩載兩浙校官詩錄與教諭趙嗣萬捐俸修學宮為同

志倡見嗣萬學宮記新採

樊廷緒字莫齋會稽舉人窮經授徒號通儒嘉慶二十三年任縣訓導善病能詩官十餘年著寓沙詩鈔若干卷

詩載兩浙輶軒錄新採

吳鳳前字昔巢海鹽人道光戊子舉人乙未大挑二等以教職用甲辰授富陽訓導每謂教士在學宮而育才必

富陽縣志 卷十七名宦

三

先書院故書院與學宮當並重富陽舊有春江書院以經理非人將不振鳳前乃悉心釐整訂定條規易董經理約每歲孟春集眾會計請兩學校官監盤督算訖則送其冊於縣宰綜覈蓋印以示慎重刊發書院劄記徵信一邑至今遵而行之莫敢廢墜又謂人道莫大於孝孝者庸行愚夫婦皆可勉而能故國家教化之成首舉孝行大源有蔣元順者事親孝鳳前為撫事實籲大府請於 朝旌表其門一邑聞之咸感動他如修葺學宮採報節孝各美政亦次第舉行俸滿以親老乞養去新纂

國朝典史

張崇業字香泉陝西長安人同治十年任富陽典史典史官卑祿薄大率掠取非分以資補給崇業自奉儉俸廉外一無沾染遇民投牒必好言排解之解之不釋則謝之曰某獄官也司獄以外非敢聞也以故在任三年民鮮有干以私者居恒衣短褐嘗於署旁隙地手持短柄鋤種菜菔或見而笑之曰官耶何苦爾崇業曰不然吾官微俸所入不足活妻子力役以補之分固應爾庸何傷聞之者咸歎息焉

新纂

國朝汛防

張震烏程人家洞庭事親至孝少讀書長入行伍道光十

富陽縣志

卷十七名宦

三

九年揚威將軍大閱補經制外委嘗署富陽汛九姓船以賄進駭曰此何物敢汗我力拒之與邵陽魏源衡山陳鍾英善又與汪士驤戴惇禧李念孫宗景藩結蓮社於三一菴後殉粵匪之難蔭卹如例

新纂

戴連陞字敘階鄞縣人光緒四年任富陽汛把總勤職善獲盜膂力過人先是富陽西北多客民匪類匿焉盜案恒有所聞雖城市中亦有盜斃學官嫫親之事連陞至首以除盜自任率弁卒嚴邏緝每夜達旦雖疾風雨不稍弛民有告盜者連陞囑勿聲張自爲走卒狀或僞作肩負經紀也者密之四鄉及鄰封各市鎮有所聞雖遠

必踪迹之能於黑夜徒步百里外手縛數盜以歸匪聞之皆膽落由是終連陞之任無盜患連陞在汛十餘年功澤入人心卒之日富陽紳商士民咸市楮帛往哭之

新纂

國朝客官附

劉芳貴湖南寶慶人由軍功累擢至副將咸豐十年秋隨總兵劉季三統兵援浙富陽爲省會咽喉大憲特檄防堵之富陽城東南兩面瀕大江北枕山西臨苕浦越浦則田疇平陸守禦較難季三駐軍鑪廠山麓守北門人呼爲大劉將軍芳貴駐軍恩波坊守西門人呼爲小劉

富陽縣志

卷十七名宦

三

將軍時新城已爲賊有勢漸逼十月某日諜知賊已越峴山入境西門適當其衝芳貴乃督率軍士壘石恩波橋上誓死守翌日賊蜂擁至漫山遍野勢銳甚因恩波橋爲芳貴所扼矢石撲攻自辰至酉不得逞日晡各收隊芳貴念賊眾我寡恐終不敵是夜徧走城中告百姓曰芳貴受國厚恩死於賊宜也爾等勿居危城以待斃其速走毋留繞城大呼者三於是居民紛紛咸出南門渡江去無一留者黎明賊又來撲勢愈猛芳貴力戰不稍卻至日午賊勢愈眾戰愈劇芳貴亟登陴自燃礮忽爲賊彈所中穿喉墜城下而卒軍士殊死戰不肯退

詎賊分股由閒道登猴嶺下撲鑪廠山營季三軍亂北門遂不守賊進城芳貴軍皆巷鬪而死無生降者季三營潰兵士悉由東門走不知賊已預遣隊由小隱山出春明浦截其去路兵士腹背受敵亦同殲焉季三死亂軍中報至省巡撫王公設奠於仙林寺哭之哀以二劉皆勇將也先是芳貴軍西門嚴紀律無絲毫擾民季三軍異是故民皆怨大劉而德小劉將軍及富陽城陷民無一人罹難愈感小劉將軍不置同治某年邑人據其死事狀牒大憲籲命建專祠格於部議不得請新纂論曰自孫吳以來迄於今得賢官師之表見者若而

富陽縣志

卷十七名宦

三

人善政善教以施諸本邑爲斷非本邑者不濫及焉至有一美舉而先後共成者蕭規曹隨若牛奩之與錢晉錫多永俄之與朱永齡姚步萊之與李世彬因類連書祇求文筆之省非敢擬蕭曹合傳體也昔陸清獻志靈壽名宦不列專門康對山志武功美惡並書律以春秋善善從長之義似皆未盡然有父母斯民之責者高坐堂皇上負君國之重下享脂膏之奉何以百年畢世致使操筆者欲贊一辭而不得而綜覈行事甚欲污諸簡青以作鑄鼎之懲鑒夫亦可三自反矣

